

Քրիստափորի գալը (1898) :

Յովնան նորէն մեկնում է դէպի Պարսկաստան, Թաւրիզ, այս անգամ արդէն իր զուիցեբուհու հետ : Ամուսինները մի երկու տարի վարում են Լիլաւայի (Թաւրիզ) հայոց դպրոցը, մինը իրրեւ տեսուչ, միւսը իրրեւ վարժուհի, երկուսն էլ, իրրեւ Գաշնակցութեան գործիչներ : Վարժուհին արագօրէն ընտելանում է իր նոր ու խորթ միջավայրին, աւելի եւս կապում է հայութեան հետ, աւելի ջերմ եւ մոլեռանդ սիրով ուսումնասիրում է հայ լեզուն եւ այնքան է կատարելագործում, որ Կովկասի մէջ հայկական շրջաններում հիացրնում էր բոլորին եւ ամօթահար անում մեր փափկասուն ու ուստախօս տիկիններին...

Շուտով, սակայն, ճակատագիրը ցոյց է տալիս երջանիկ զոյգին իր անողոք ժանիքը : Ծանր, անբուժելի ցաւը բոյն է դնում տիկնոջ կրծքում, եւ երկուսով շտապում են դէպի Զուիցերիա : Յոնանը դարձեալ մի երկու տարի գրադուում է բիւրօական գործերով, իսկ տիկինը բժշկուում է լեռներում : Ոչ մի բժշկութիւն սակայն չի օգնում : Եւ այնուհետեւ, գրեթէ ամբողջ քառորդ դար, երկուսի կեանքը մի անհատնում մարտիրոսութիւն է, մի դանդաղ ու անողորմ մահացում : Մինը մեռնում էր, աստիճանաբար հալւում Ֆիզիքապէս, միւսը մեռնում էր մանաւանդ հոգեպէս :

Երկուսի կեանքն էլ իրօք վերջացած էր : Բայց նոյն անտրտունջ, նոյն ստօյիկեան արիութեամբ շարունակում են իրենց քառիչը, վերադառնում են դարձեալ Թաւրիզ, նուիրում են դարձեալ երկար տարիներ իրենց սիրած պաշտօնին :

Երկուսն էլ ժողովրդական էին Թաւրիզում, նոյնիսկ ոչ-գաշնակցական շրջաններում : Յոնանը՝ իր հմուտ ու կարող տեսչութեամբ եւ իր շիտակ, անկաշառ բնաւորութեամբ, Հօրթանը՝ իր գարմանալի ընդունակութիւններով եւ մանաւանդ իր ջերմ հայկական հայրենասիրութեամբ :

Սակայն, օր աւուր սպառում է կեանքի կանթեղը... Թորքախօը, նպաստաւորուած կեանքի ճնշող պայքարից, ապրուստի սուղ միջոցներից, շարունակում է իր աւերումը եւ նախկին կայտառ, քաջատղջ զուիցեբուհին կմախք դարձած, գալիս է նորէն իր Ալպեան

հայրենիքը, այս անգամ մեռնելու համար...

Եւ մահը տեղի ունեցաւ իր ամուսնու մահուանից երկու տարի առաջ : Այդ մահը իսպառ խորտակեց եւ միւսին... Ամէնքը շնջում էին, որ Յովնանի օրերն եւս համրուած են : Նա մընում է, որպէս ուրուական, խմբագրատան չորս պատերի մէջ, որոնք շարունակ լսում են հառաչանք ու հեծեծանք : Շարունակում է դարձեալ ապրել եւ յուզուել հայրենիքի ու կուսակցութեան ցաւերով, տանում է ընթացիկ գործերը, խորհուրդներ ու հրահանգներ է տալիս մօտ ու հեռու ընկերներին :

Ամառը գնացի վերջին այցելութեան : Երեք տարի էր հեռացած էի Ժընեւից : Գիտէի, որ Յոնանը իր վերջին հանգրուանումն էր : Ծանր սրտով քալեցի դէպի մեր փոքրիկ, համեստ վիլլան, կորած Champel-ի ծառաստանում : Բարձրացայ դէպի հիւանդը : Պառկած էր անշուք մահճի վրայ, արեւոտ սենեակներից մէկում : Մեն-մինակ, շուրջը ոչ ոք : Բժիշկն արդէն արգիլած էր երկար խօսակցութիւն :

Ուրախութեան ժպիտը փայլեց, բայց նրա արանքից նշմարուում էր անյատակ վիշտը : Զգում էի, որ մահը իր դաժան մագիլներով ճախրում է այդ ազնիւ դէմքի վրայից, որ նա շուտով պիտի դար գոցելու այդ խոշոր ու սիրուն աչքերը, վերջ տալու 25 տարուան մի ցաւոտ մղձաւանջի :

Եւ սկսեց անվերջ հարց ու փորձ : Ինչե՞ր չէին անցել «երկրի» մէջ ու Կովկասում, այդ երեք տարուայ ընթացքում... Ես առաջին սուրհանդակն էի : Յուզում էր, արտասուում եւ անվերջ խօսում :

Իր մասնաւոր կեանքին գալով, իմացայ, որ սպառում են միջոցները :

— «Մօտիկ ընկերներս, շնորհակալ եմ, չմոռացան ինձ... Այս երկու տարին շարունակ օգնեցին, բայց այժմ այլեւս Կովկասից հնարաւոր չէ դրամ փոխադրել... Թէեւ հիւանդ, պէտք է մի կերպ Կովկաս գնամ...» :

Ամերիկայի ընկերները զրկեցին մի գումար : Բայց սաստիկ նեղում էր հիւանդին այն միտքը, որ մինչեւ հայրենիք վերադառնալը պէտք է ապրի կուսակցական միջոցներով : Որքան ժուժկալ ու սակաւապետ էր իր մեծ ընկերների պէս, նոյնքան բծախնդիր էր կուսակցութեան գրամարկդի վերաբերմամբ...